

TI GIMONG AGSAGANA NGA AGDAYAW ITI DIOS

PRELUDIO/ PANNAKASINDI TI KANDELA (Ubbing)

KANKANTA ITI PANAGSAGANA CYF

TI GIMONG AGDAYAW ITI DIOS

**AYAB ITI PANAGDAYAW (Mangidalan-M; Kongregasion-K)**

**M:** Kablaawankayo iti nagan ti Apo isu a napudno a nangtakunaynay ken nangitag-ay kadatayo iti daytoy a lawas. Daytoy ti Domingo dagiti ubbing ken maika-uppat a Domingo ti Apo!

**K:** Immaykami tapno rambakan dagiti kinapudnona iti inaldaw-aldaw kangrunaanna daytoy a panawen ti pandemia.

**M:** Maiparbeng nga itan-ok ti napateg a naganna iti sangoanan dagiti pinarsuana; kasta met iti sangoanan dagitoy nga ubbing a sagutna kadatayo.

**Amin:** Agkaykaysatayo a mangidayaw iti napateg a naganna. Ipakaammotayo dagiti naindaklan nga inaramidna!

**KANTA MANIPUD KADAGITI UBBING**

**+IMBOKASION (Amin)** Napudno a Dios. Manipud kadagiti agduduma a pakaseknan, immaykami nga annakmo a mangsabat kenka a nagannakmi iti daytoy a balaymo. Umaykami agsakdo iti pammapijsa babaen kadagiti saom, babaen iti panagkakaddua ken pannakapabaro iti komitment para iti pannakaipasdek ti pagariam. Pasangbayenmi ti Espirito Santo isu nga agrabaho iti daytoy a panagummongmi ket magun-odmi kadi ti pannakaay-ayom a kas iti pannakaay-ayom kadagiti ubbing idi immayka ditoy rabaw iti daga. Iti nagan ni Jesus nga Apomi, Amen.

**+IMNO ITI PANAGDAYAW: "TI KINASANTAK TOY DAGA"**

Ti kinasantak toy daga, ti raniag idia langit,  
Ti sayangguseng ti aldaw, ti talna ti rabii  
Toy lubong a napintas, Apo Dios, agyamankam

Ti kinadungngo ti balay, nagannak ken kakabsat,  
Gangannaet ken gagayyem ti panagsisinnakit  
Ti ayat ti panagbiag; Apo Dios, agyamankam.

Ti bunggoy a nakristianoan, surotenna ni Jesus,  
Ti kararua pasantoaenna, tapno maitan-okka  
Nagballigit' Iglesias; Apo Dios agyamankam.

Ti kapatgan a sagutmo, O Dios, sika met laeng

Ti nainsiriban nga ayatmo, maiparang ken Jesus  
Bendision a nawadwad; Apo Dios, agyamankam.

TI GIMONG KUMABLAAW/ AGBABAWI KEN MANGIBABAET

KABLAAW/ PAKASEKNAN TI IGLESIA Pastor (P)

**AYAB ITI PANAGBABAWI**

**M:** Umasidegtayo iti Apo ket dumawattayo iti pammakawanna

**G:** Iti kinaadu dagiti as-asikasoen ken pakakumikomanmi, adu dagiti panawen a malipatan dagiti bambanag a mataginayon;

**Babbai:** Mababay-an dagiti pannakisuro dagiti ubbing isuda a sagutmo iti familia, Iglesia ken iti kagimongan. Isuda dagiti sumaruno kadagiti tugot dagiti nataengan para iti masakbayan ti kagimongan:

**Lallaki:** dadduma nagbalinda a biktima iti pannakaidadanes, malnutrision, bolnerableda iti sakit, pannakaabusu, napaidaman iti edukasion ken dagiti basic a karbengan, pwera a panagtrabaho, trafficking ken dadduma pay.

**Amin:** Iti daytoy a panawen ti pandemia, dagiti ubbing ti maysa kadagiti sector a napalalo iti pannakaapekto iti masakbayanda. Ni Jesus kinuna, "No adda siasinoman a pakaigapuan ti panagbasol ti maysa kadagitoy nga ubbing a mamati kaniak, nasaysayaat koma a maigalut ti dakkal a gilingan a bato iti tengged dayta a tao sa mailemmes iti taaw" (San Mateo 18:6). ***Naulimek a panagbabawi***

**PAMMATALGED ITI PANNAKAPAKAWAN (P)**

Ni Jesus managayat ken mamakawan a Dios, awatenyo ti pammakawanna kas kinunana, "Palubosanyo dagiti ubbing nga umay kaniak. Diyo paritan ida ta dagiti kas kadakuada ti agtagikua iti Pagarian ti Dios. Laglagipenyoy a dinto makastrek iti Pagarian ti Dios ti siasinoman a di umawat iti daytoy a Pagarian a kas iti panangawat ti maysa nga ubing" (San Marcos 10:14a-15).

**KARARAG TI GIMONG (Elder ti Iglesia)**

**Sungbat ti Gimong: (ikanta)**

God answers pray'r in the morning. God answers pray'r at noon.

God answers pray'r in the evening. So keep your heart in tune. Amen.

TI GIMONG DUMNGEG ITI SASAO TI DIOS

PANNAKAIBASA TI TEKSTO Dagiti Salmo 78:1-8

**-Sungbat ti Gimong:** Ti sasao a naragsak. Sao a mamabiag 2x

**\*MENSAHE BABAEN TI KANTA**

\* MENSABE BABABAEN ITI SAO DM Julie Dayag-Agno  
Principal, UCCP Integrated School, Cabanao, La Trinidad, Benguet

TI GIMONG MAKARIT KEN SUMUNGBAT

**AYAB ITI PANANGTED**

**M:** Ti ministri ti Iglesia saklawenna ti naCristianoan a pannakasursuro ken panagdakkel a pakairamananna dagiti ubbing. Ti pannakipag-daliasat iti Dios ket nawatiwat, laglagipen ti kinapudno ti Dios iti dalan ken iti pannakikadduana. Ipaaytayo ngarud dagiti sagut/apagkapullo/karkari ken pagyaman ket ipaay a pagyaman ken pagdayaw kenkuana.

PANANGIPAAY ITI SAGSAGUT/PAGYAMAN/ APAGKAPULLO/KARKARI ITI DIOS:

+ DOKSOLOHIA/ KARARAG TI PAGYAMAN (Agpasango dagiti ubbing ket mainayonda iti kararag pannakaidaton)

HIMNO ITI KOMITMENT " ALA NGARUDEN"

Iti Adal Ni Jesus A Naayat, Intay Suroten A Siraragsac,  
Ket Dagiti Basol Intay Iwagsak, Kinadalus Isucat.

**Koro 1:**

*Ala Ngaruden,  
Intay Sarangten Ti Kinadawel,  
Ta Ni Jesus Dinatayto Ulilaen.*

**Koro 2:**

*Intayo ngaruden 2X  
Sarangten ti dalan a nadawel  
Ti dackel nga asina isut' balonen  
Ket ditay ngad agbuteng.*

Nupay Ti Uyaw Nga Nailubongan, Nagwarnac Cadagiti Daldalan;  
Dicay Agbuteng Ta Bantayannatay, Ken Jesus Nga Aritay (koro).

Lisiantay Dagiti Panagbasolan, Ti Kinadalus Pagpilitantay  
Ipapuso Ti Pinagpapagayam, Ken Adal Ti Aritay (koro).

Lasaten A Siraragsac Ti Dalan, Nupay Narigat Intay Anusan  
Alaen Ti Bandera Ti Salacan, Ingganat' Panungpalaan (koro).

**KARARAG ITI KOMITMENT KEN PANNAKALDALAN/PAMENDISION (P)**

**POSLUDIO/RESES IONAL**

\*\*\*\*\*

**PAKAAMMO:**

**September 20- Youth Sunday**

**27-Fellowship of the least coin**

**October 4- World Communion & CYAF Sunday**



**United Church of Christ in the Philippines  
NORTH LUZON JURISDICTION**

**CHRISTIAN EDUCATION MONTH**

**URNOS ITI PANAGDAYAW ITI DIOS ITI DOMINGO  
DAGITI UBBING KEN MAIKA-UPPAT A DOMINGO  
KALPASAN TI PANAWEN TI APO**

**Septiembre 13, 2020**



"Dagiti programa ken ministritayo kas Iglesia ket ekspresion ti komitment iti pammati ken ken ayab ti mision. Mangted dagitoy iti porma ken realidad ti pinatitayo. Isuda dagiti mangipakita iti kinaisu, aramid dagitoy. Simbolo daytoy ti biag ken aramiditayo. Buangayenna daytoy ti panagdalliasattayo" (Calendar planner Sep. 2020).

## **TEKSTO: Dagiti Salmo 78:1-8**

### **Ti Kinapudno ti Dios kadagiti Nasukir a Tattaona**

1Dakayo a tattaok,

dumngegkay iti daytoy pannursurok,

ket ipamaysayo nga allingagen ti innak isao.

2Pangngarig ti innak aramaten;

ilawlawagko dagiti palimed idi ugma,

3dagiti nangnggeg ken naammoantayo

nga imbaga dagidi ammatayo.

4Ditay ilimlimed ida kadagiti annaktayo,

no di ket isaritatayo kadagiti kaputotan a sumarsaruno

ti pannakabalin ken naindaklan a gapuanan ti APO,

agraman dagiti nakaskasdaaw nga aramidna.

5Nangituyang iti linteg kadagiti Israelita;

nangipaulog iti bilin kadagiti kaputotan ni Jacob.

Imbilinna kadagiti kapuonantayo

nga isuroda dagitoy kadagiti annakda

6tapno maammoan dagiti sumarsaruno a kaputotan a di pay

nayanak,

ket isurodanto met kadagiti bukodda nga annak.

7Iti kasta, agtalebda met iti Dios,

ket dida lipaten dagiti aramidna

no di ket kanayon a tungpalenda dagiti bilbilinna.

8Saanda koma a kas kadagiti kapuonanda

a nasukir ken nasubeg a kaputotan.

Saan a natibker ti pammatida iti Dios,

ket saanda a nagtalinaed a napudno kenkuana.